

delaissast la coustume de son abstinence, il retournoit apres ces labours par lui faictes en jeun cœur en sa maison. Car nulement ne se vouloit acorder de mengier avec personne qui le priaist. Il auoit lesperit de prophesie car il prophetiza vng reclus apparoir par vice de conuoitise laquelle chose sensieuy, car le meschant non pas longuement apres soy departant de tout en tout de la voie de penitance et de salut et alant dampnablement voies non pas bonnes. Mais apres ses pechies jusques à sa fin labouroit tout par tout en appaisant discordes de tout son pouoir et ceulx quil ne pouoit acorder par ses admonnestemens rapelloit tantost aconcorde son oroison faitte a Dieu.

On ne porroit raconter ne onques ne fu veu en nostre temps la grant charite pitie et misericorde quil auoit enuers les poures souffreteux femmes vefues et orphelins tout le temps de sa vie, car tout ce quil receuoit ou pouoit auoir tant des biens de sainte eglise come de son patremoine il donnoit aux dessus dis poures sans nulle difference.

Quant il demouroit a Resnes, lui estant official de larcediaere et aussi auant quil muast sa vie, il faisoit aux grans festes solempnelles appareillier viandes largement et a heure de disner, la grant porte de son hostel ouuerte, il faisoit venir les poures pour mengier et leur administroit de ses propres mains. Et apres il mangoit avec .ii. poures enfans lesquelz pour lamour de Dieu il soutenoit a lescole le mieulx quil pouoit. Des poures enfans orphelins estoit il tous jours curieux et aussi comme leur pere, les enuoyoit a lescole en les soustenant de son propre et si paioit aussi les salaires de leurs maistres; il vestoit curieusement les poures nuds et indigens de nostre Seigneur.

Il aduint vne fois quil auoit fait faire pour lui mesmes vne cotte et vng chaperon de drap tout vng, si les donna a vng poure, ayant greigneur plus grande cure despoures que de son propre corps. Il tenoit hospitalite indiferament aux poures et aux pelerins en vne maison laquelle il auoit ad ce fait faire, et leur administroit a mengier lit et feu po<sup>r</sup> eulx chauffer en temps dyuer. En quelconques lieu que il aloit les poures souffreteux acourans a lui de toutes pars le sieuoient, car leur estoit tout ce quil auoit. Il donnoit suaires aux poures tres-passez et les portoit en terre sainte avec les aultres poures et de ses propres mains les mettoit en terre.

Il lui vint vne fois vng poure alencontre, mais il nauoit pour lors riens pour lui donner, si lui donna son chaperon et demoura tout nu le col et la teste. Il estoit de tres aspre vie a son corps car il estoit si acoustume de estre en oroisons et en estude, que le plus de fois il passoit la nuit sans dormir. Et ne dormoit jamais si non quil fest fort traueillie de estudier ou de cheminer. Et quant il dormoit si se couchoit il sur la terre comme dessus est dit. Il mettoit dessoubz sa teste en lieu de oreillier aulcune fois son liure et aulcune fois vne pierre. Il portoit continuelement sa haire sur sa chair et par dessus vne chemise destoupe po<sup>r</sup> mucier sa haire.

Quant il estoit encore official de la cite de Triguier, il vsait tant seulement de pain gros et de potage comun aux laboureurs pour toutes viandes et ne beuuoit sinon eaue froide. Et depuis celui temps il fu .xi. ans et jusques a sa mort que il jeuna chascun an le karesme en pain et en eaue et samblablement chascun aduent de nostre Seigneur et depuis la feste de l'ascencion jusques a la penthecouste et aussi en toutes les vigilles des quatre temps et vigilles de nostre Dame, des apostres et aussi es aultres jeunes establies par leglise, il jeuno ten pain et en